

北京圖書館 編

北京圖書館藏珍本
年譜叢刊



第 51 冊

北京圖書館出版社

□ 北京圖書館 編

北京圖書館藏珍本
年譜叢刊

北京圖書館出版社

第 51 冊



第五十一冊目錄

戚少保年譜耆編卷六至卷末		一
王師竹先生年譜		六五五

戚少保年譜耆編卷之六

閩嗣祚國彙纂

緄嗣昌國集錄

廩嗣報國詳訂

庠嗣興國參校

嘉靖四十五年丙寅家嚴三十九歲
春正月追吳平入廣東

初三日巳未傳應嘉與廣東叅將湯克寬合踪廣
巡按陳公聯芳行布政萬公士和給餉海南道姚
公世熙添撥快船十艘海北道畢公竟立添撥吏

役蘇宗書領漁船三十艘仍各送水手嚮道其經過雷廉瓊等府分俱備牛酒餉兵

二月遣吳平入安南國

吳平偵得大兵將及收拾敗寇羅漢卿餘燼馳抵交趾界欖埭急造大[舟]鍾船一艘坐駕出洋僉事畢公會委廉州知府張公仙同知昌公應會推官湯公惟允及分守雷廉叅將王公寵分布軍馬堵截關隘岸口賊既不能登岸復爲二省兵舟追逼遂遁入安南兩廣軍門又委畢公監督窮追仍先行文安南國知會夾剿遂按范子儀平交圖說進

兵焉

三月覆勘仙遊等功賜白金文綺有差進職兼管潮
惠二府暨伸威等營諸戎務

二十五日丙辰師次安南永安州遣諜懸賞諭令
安南殺賊立功二十六日丁巳夷官阮伯玕解送
俘賊二名賊首五十級三十日辛酉師次安南萬
甯州萬橋山永甯社住泊

御史陳萬言題勘仙遊等處戰捷功次云前項倭
奴侵突內地謀襲城邑仰藉皇上天威默運聖武
廣昭故一時文武諸臣率皆協力同心在水戰則

三路出奇沖沉三十餘舟在陸戰則三捷奏功擒
斬二千餘寇外夷由是奪魄內逆因之寢謀東南
地方頗稱甯謐此皆總兵都督同知戚某主闢授
算愈出愈奇而紀律嚴明萬眾之心如一與同前
提督副都御史譚綸臨敵運籌百發百中而賞罰
必信三軍之氣用張之二臣者勲庸特著勞苦功
高尤當優命者也疏上各欽賞銀二十兩紵絲衣
二襲巡按御史陳萬言題會剿吳平疏云提兵炎
海數月露居排正陣於龍眼沙出奇兵於宰豬澳
指揮談笑一鼓蕩巢勛庸素著勞苦功高部覆看

得戚某威名大著人心悅服合候命下令戚某兼
管潮惠伸威等營得旨俞大猷革任閑住惠潮二
府并伸威營着戚某兼管

夏四月追吳平於安南國萬橋山滅之

是月朔偵報吳平賊舟三十八艘灣泊萬橋山外
澳傳都司與湯叅將會議閩兵由西出爲正軍廣
兵由東出爲奇兵四路簇發嚴令各舟以擒渠魁
爲最不尚首功各舟依派駕發申時出萬橋山外
平窺見兵船卒至遂棄棹揚篷開遁我兵併力追
及各認中鍾大船攻擊賊舟結艚拒敵且戰且走

自申抵戍賊猶死鬪時值昏暗颶風大作守備楊文李騰蛟見晦夜濤狂恐遲延致脫督令哨官陳大修等用諸火器齊攻平猶衣紅袍立尾樓驅眾死戰大呼一人不許生降及我兵攻圍窘急勢不能支繫大銃於足而投水時火烈風狂煙焰障天焚溺殆盡計擒斬共三百九十八夷海道肅清居民安堵

巡按御史陳萬言題勘四十三年汀漳二處草賊楊一蘇阿普及廣東藍松山等賊聚黨幾萬餘眾據地方數百里殺官殃民神人共憤該鎮總兵戚

部兵征剿元惡以次就擒脅從以時撲滅又德化
小尤仙遊社巖大田三山等捷疏稱鎮守總兵戚
負忠勇而經百戰有古大將之風前監軍今升巡
撫汪推赤心以撫三軍有屈羣策之畧二臣著勲
庸最著勞苦功高尤當優論

秋七月兩院交薦

巡按御史陳萬言題爲專任大將以奠東南疏稱
戚某忠勇得於性成韜畧精於素練誓心報國愛
士卒甚於愛身勵志匡時保黎民如保赤子橫戈
轉戰八郡賴以乂安振旅宣威三省資其節制功

高而益勵謙虛居安而常若對敵舟師條約庶幾
於橫海樓船紀效新書出入乎孫吳兵法聞警報
則怒髮沖寇氣吞河海講軍令則拔刀斬案機變
風雲夜傳土塊而士卒暗識機謀樹幟受降而賊
黨爭歸活命倭奴畏之如虎閩奧仰之若神此一
臣者信古今之奇才實熙朝之名將所當專任以
奠東南者也

巡撫都御史汪公會薦疏云名與寔符識與才合
承家振開先之烈徇國忘啟後之圖心不伐於功
高身益修於敬勝伏枕臨戎病相尋而罔恤傾囊

酬士家屢空而自如允執兵之至要好謀而成動
循武之善經見可而進東南永賴遐邇咸宜此蓋
可以義動不可以利回可以禮驅不可以威劫者
也部覆命下附記在簡超擢用

九月奉勅仍畱鎮閩浙等處尋覆勘龍頭寨沙堤釣
澳等功資白金文綺有差

巡撫都御史塗澤民巡按御史胡維新會題爲乞
留大將專鎮全閩以裨安攘疏部覆命下照原奉
勅書專鎮福興泉漳延建邵武福甯浙江金溫等
處留鎮久任管事

巡按御史胡維新勘龍頭寨功次稱云始則出令如風而決策於前繼則不動如山而堅持於後撫瘡痍有同父子視諸賊如在掌中之一臣者勲業素著勞苦功高尤當優論疏上部覆欽賞銀三十兩紵絲二表裏

巡按御史胡維新覆勘十四年春汛沙堤釣澳等處功次云前項倭奴乘汛突入虐焰孔熾仰仗皇上天威將士用命或奮擊於海洋使其全艘覆沒或截剿於海岸俾其片甲無回旬月之間迅掃無餘是皆總兵戚某指授攻守盡屬方畧之妙握

機神應用張殺伐之威此一臣者雖已先奉欽賞
但今地方已定寇亂悉平尤當厚賚以示優錄疏
上部覆欽賞銀三十兩紵絲二表裏

冬十月題奏經畧廣事條陳戡定機宜疏

竊念臣本駑駘世受豢養惟所任使務在捐糜廼
蒙皇上置臣八閩授臣專閩功微賞溢力薄任難
夙夜皇皇不能仰酬萬一是懼近奉明旨兼管惠
潮地方及伸威營務蓋畀之至重投之至艱臣受
殊恩敢不慕義竭忠以圖報稱竊見各省軍務並
設鎮巡然皆撫臣效謀鎮臣效力猶之股肱心膂

相須而後成功故凡一切軍情悉由撫臣建白而後折衷於兵部取裁於廟謨指示發蹤勝算具在武臣猶走狗也驅之則前耳乃今臣在福建而惠潮則隸廣東伸威營則隸南贛各該撫臣厥有分土事非畫一謀豈僉同揣臣以一身周旋各省三軍門之間身難分投才乏合從聯遠爲近幹異爲同委非所能亦非所職也若臣復拘常調不盡直言或情狀未悉上聞而訐謬亦難適度必俟論定而後從之其如曠時廢事何臣竊以今日之廣東猶五年前之福建福建外患雖重腹心受傷猶輕

廣東外患雖輕腹心受傷最重受傷之說甚長臣不敢遠引請借福建爲喻福建嘗苦倭寇不啻十年亦嘗設鎮巡計兵食日不暇給而卒無尺寸之效亦以寔情未盡上達而處置未盡得宜也至都御史游震得都御史譚綸據寔上請乃發內帑先後共五十萬金許臣募素練之兵二萬餘衆鼓行入境戎心已寒易若發蒙順如破竹海倭山寇以次蕩平繼而都御史汪道昆與巡按御史陳萬言協謀調度會計軍儲易置將領至此三更方畧然後閩事粗定大病始除此已然之效也臣於上年

追剿吳平殘黨深入潮州地方則見編戶逃亡賊
巢聯絡臣詢其故厥有由來蓋潮惠去兩廣軍門
遠在數千里外此中脫有嘯聚官司多不寔聞率
以招撫爲善謀以羈縻爲完策旣入其莖或又聽
地方報仇或復誘致要賞上旣無信下自多疑以
故招而屢叛叛而復招遠近效尤其不爲盜者幾
希兼之責任未明章程無定兵食詘乏郡縣恣睢
卽能如救聞者救之猶懼未易爲力故臣不敢以
出位爲嫌條陳十事儻蒙采納見之施行使臣有
展布之期或可收實用之績也伏乞勅下兵部速